



韋蘇州集序



韋蘇州唐史不載其行事林寶姓纂云周道
遙公復之後左僕射扶陽公待價生司門郎
中令儀令儀生鑿鑿生應物應物生監察御
史河東節度掌書記慶復李肇國史補云為
性高潔鮮食寡欲所居焚香掃地而坐其為
詩馳驟建安已還各得風韻詳其集中詩天
寶時扈從遊幸疑為三衛水泰中任洛陽丞
京兆府功曹大曆十四年自鄆縣令制除櫟

陽令以疾辭歸善福精舍建中二年由前資
除比部員外郎出為滁州刺史改刺江州追
赴闕改左司郎中貞元初又歷蘇州罷守寓
居永定精舍其後事迹究尋無所見肇又云
開元以後位卑而著名者李北海王江寧李
館陶鄭廣文元魯山蕭功曹張長史獨孤常
州崔比部梁補闕韋蘇州以集中事及時人
所稱考其仕宦本末得非遂止於蘇邪案白
居易蘇州荅劉禹錫詩云敢有文章替左司

左司蓋謂應物也官稱亦止此有集十卷而
綴叙猥并非舊次矣今取諸本校定仍所部
居去其雜廁分十五總類合五百七十一篇
題曰韋蘇州集可以繕寫云嘉祐元年十二
月二十二日太原王欽臣記

韋蘇州集卷第一

賦

冰賦

夏六月白日當午火雲四至金石灼爍玄泉
 潛沸雖深居廣廈珍簟輕簷而亦鬱鬱燠燠
 不能和平其氣陳王於是登別館散幽情招
 親友以高會尊仲宣為客卿賭頌冰之適至
 喜煩暑之暫清王乃誇賓而歌曰含皎皎兮
 瓊玉姿氣淒淒兮奪天時飲之瑩骨兮何所

菱

思可進於賓請客卿為寡人美而賦之客諾
曰美則美矣而大王不識其短夫謂之瓊玉
竊名器也氣奪天時干陰陽也內熱飲之媒
其疾也寵一物而三失德且出寒暑而至下
薦宗廟而至高僕竊感之而歔歔安得不為
之而抽毫何積陰之勝純陽兮惟此玄冰居
炎天之赫赫兮獨嚴厲乎稜稜其始也月玄
冥日北陸天地閉水泉縮動靜一變剛柔反
覆壯以烈風積如群玉由是依廣澶漫憑高

崢嶸大寒御節萬動潛形浮彩浩浩仰吞素
靈群山早曙陰壑夜明古者祭之黑牡其藏
以節袂之桃弧其出以潔今明明大魏禮物
必備實大王罇俎之常品非小民造次之所
致若尊卑異等頒命有度碎似墜瓊方如截
璐况粉壁雲矗象筵霜布座有麗人皎然俱
素雖衆賓之同輝諒為物之難固其竊名假
質以謬一時之賞也如此若乃對脩竹臨方
塘俾炎作寒兮反我天常嗟絺綌之失御於

三伏兮亦紈扇委篋而內傷其嚴沍之威以
干陰陽之候也如此若皎潔的皜與時消釋
或沉珠於杯或化璞於液王將甘飲聊以自
適豈知乎一寒一溫日夜相激久之以生疾
兮內外不和而怵惕其翫意而媒疾也如此
觀其劣足以淒一室利庖厨俾甘肥晚敗醇
釀不渝非可調湊理安營魄柰何以誇客陳
王於是赭然而慙曰寡人生於深宮懵於服
食左右唯燕姬趙女侈服美色微客卿之言

則何以雪余惑方當命有司而撤冰書盤盂
以自式

五言古詩

擬古十二首

辭君遠行邁飲此長恨端已謂道里遠如何
中險艱流水赴大壑孤雲還暮山無情尚有
歸行子何獨難驅車背鄉國朔風卷行迹嚴
冬霜斷肌日入不遑息憂歡客髮變寒暑人
事易中心君詎知冰玉徒貞白

黃鳥何關關幽蘭亦靡靡此時深閨婦日照
紗窓裏娟娟雙青娥微微啓玉齒自惜桃李
年誤身遊俠子無事久離離不知今生死
峨峨高山巔澗澗青川流世人不自悟馳謝
如驚颺百金非所重厚意良難得旨酒親與
朋芳年樂京國京城繁華地軒蓋凌晨出垂
揚十二衢隱映金張室漢宮南北對飛觀齊
白日游泳屬芳時平生自云畢
綺樓何氤氳朝日正杲杲四壁含清風丹霞

射其牖玉顏上哀轉絕耳非世有但感離恨
情不知誰家婦孤雲忽無色邊馬爲迴首曲
絕碧天高餘聲散秋草徘徊惟中意獨夜不
堪守思逐朔風翔一去千里道

嘉樹藹初綠靡蕪吐幽芳君子不在賞寄之
雲路長路長信難越惜此芳時歇孤鳥去不
還絨情向天末

月滿秋夜長驚鳥號北林天河橫未落斗柄
當西南寒蛩悲洞房好鳥無遺音商飈一夕

至獨宿懷重衾舊交目千里隔我浮與沉人
生豈草木寒暑移此心

酒星非所酌月桂不為食虛薄空有名為君
長歎息蘭蕙雖可懷芳香與時息豈如凌霜
華歲暮藹顏色折柔將有贈延意千里客草
木知賤微所貴寒不易

神州高爽地遐瞰靡不通寒月野無綠寥寥
天宇空陰陽不停馭貞脆各有終汾沮何鄙
儉考槃何退窮反志解牽跼無為尚勞躬美

人奪南國一笑開芙蓉清鏡理容髮褰簾出
深重艷曲呈皓齒舞羅不堪風慊慊情有待
贈芳為我容可嗟青樓月流影君惟中

春至林木變洞房夕含清單居誰能裁好鳥
對我鳴良人久燕趙新愛移平生別時雙鴛
綺留此干恨情碧草生舊迹綠琴歇芳聲思
將魂夢歡反側寐不成攬衣迷所次起望空
前庭孤影中自側不知雙涕零

秋天無留景萬物蔽光輝落葉隨風起愁人

獨何依華月屢圓缺君還浩無期如何雲雨
絕一去音問違

有客天一方寄我孤桐琴迢迢萬里隔託此
傳幽音冰霜中自結龍鳳相與吟絃以明直
道漆以固交深

白日淇上沒空閨生遠愁寸心不可限淇水
長悠悠芳樹正妍鬱春禽自相求徘徊東西
廂孤妾誰與儔年華逐絲淚一落俱不收

雜體五首

沉沉匣中鏡為此塵垢蝕輝光何所如月在
雲中黑南金既雕錯鞶帶共輝飾空存鑒物
明坐使妍蚩惑美人竭肝膽思照冰玉色自
非磨瑩工日日空歎息

古宅集祆鳥群號枯樹枝黃昏窺入室鬼物
相與期居人不安寢搏擊思此時豈無鷹與
鷂飽肉不肯飛既乖逐鳥節空養凌雲姿孤
奉肉食恩何異城上鷗

春羅雙鴛鴦出自寒夜女心精煙霧色指歷

千萬緒長安富貴家妖艷不可數裁此百日
功惟將一朝舞舞罷復裁新豈思勞者苦
同聲自相應體質不必齊誰知賈人鐸能使
大樂諧鏗鏘發官徵和樂變其哀人神既昭
享鳳鳥亦下來豈非至賤物一奏升天階物
情苟有合莫問玉與泥
碌碌荆山璞卞和獻君門荆璞非有求和氏
非有恩所獻知國寶至公不待言是非吾欲
默此道今豈存

與友生野飲效陶體

攜酒花林下前有千載墳於時不共酌奈此
泉下人始自玩芳物行當念徂春聊舒遠世
蹤坐望還山雲且遂一歡笑焉知賤與貧

效陶彭澤

霜露悴百草時菊獨妍華物性有如此寒暑
其柰何掇英泛濁醪日入會田家盡醉茅簷
下一生豈在多

大梁亭會李四栖梧作

梁王昔愛才千古化不泯至今蓬池上遠集
八方賓車馬平明合城郭滿埃塵逢君一相
許豈要平生親入仕三十載如何獨未伸英
聲久籍籍臺閣多故人置酒發清彈相與樂
佳辰孤亭得長望白日下廣津富貴良可取
竭來西入秦秋風旦夕起安得客梁陳

賈常侍林亭燕集

高賢侍天階跡顯心獨幽朱軒駑關右池館
在東周繚繞接都城氤氳望嵩丘群公盡詞

客方駕永日遊朝旦氣候佳逍遙寫煩憂綠
林靄已布華沼澹不流凌露摘幽草涉煙翫
輕舟圓荷旣出水廣廈可淹留放神遺所拘
觥罰屢見見酬樂燕良未極安知有沉浮醉罷
各云散何當復相求

移疾會詩客元生與釋子法朗因貽
諸曹

對此嘉樹林獨有戚戚顏抱瘵知曠職淹旬
非樂閑釋子來問訊詩人亦扣關道同意暫

遣客散疾徐還園徑自幽靜玄蟬噪其間高
窓瞰遠郊暮色起秋山英曹幸休暇恨恨心
所攀

慈恩伽藍清會

素友俱薄世屢招清景賞鳴鐘悟音聞宿昔
心已往重門相洞達高宇亦遐朗嵐嶺曉城
分清陰夏條長氤氛芳臺馥蕭散竹池廣平
荷隨波泛迴飈激林響蔬食遵道侶泊懷遺
滯想何彼塵昏人區區在天壤

扈亭西陂燕賞

杲杲朝陽時悠悠清陂望嘉樹始氤氳春遊
方浩蕩况逢文翰侶愛此孤舟漾綠野際遙
波橫雲分疊嶂公堂日為倦幽襟自茲曠有
酒今滿盈願君盡弘量

西郊燕集

濟濟衆君子高宴及時光群山靄遐矚綠野
布熙陽列坐遵曲岍披襟襲蘭芳野庖薦嘉
魚激澗泛羽觴衆鳥鳴茂林綠草延高岡盛

時易徂謝浩思坐飄颺眷言同心友茲遊安
可忘

春宵燕萬年吉少府中孚南館

始見斗柄迴復茲霜月霽河漢上縱橫春城
夜迢迢賓筵接時彥樂燕凌芳歲稍愛清觴
滿仰歎高文麗欲去返郊扉端為一歡滯

滁州園池燕元氏親屬

日暮遊清池疎林羅高天餘綠飄霜露夕氣
變風煙水門架危閣竹亭列廣筵一展私姻

禮屢款芳罇前感往在茲會傷離屬頽年明
晨復云去且願此留連

郡樓春燕

衆樂雜軍鞞高樓邀上客思逐花光亂賞餘
山景夕為郡訪凋瘵守程難損益聊假一杯
歡暫忘終日迫

南塘泛舟會元六昆季

端居倦時燠輕舟泛迴塘微風飄襟散橫吹
繞林長雲澹水容夕雨微荷氣涼一寫惰勤

意寧用訢華觴

郡齋雨中與諸文士燕集

兵衛森畫戟燕寢凝清香海上風雨至逍遙
池閣涼煩痾近消散賓客復滿堂自慙居處
崇未覩斯民康理會是非遣性達形迹忘鮮
肥屬時禁蔬果幸見嘗俯飲一杯酒仰聆金
玉章神歡體自輕意欲凌風翔吳中盛文史
群彥今汪洋方知大藩地豈曰財賦疆

奉同郎中使君郡齋雨中宴集

好鳥依嘉樹飛雨灑高城况與數君子列座
分兩楹文雅一何麗林堂含餘清我公未歸
朝遊子不待晴白雲帝鄉遠滄江楓葉鳴拜
手欲無言零淚如酒傾寸心已摧折別離方
骨驚安得凌風翰肅肅賓天京

軍中冬燕

滄海已云晏皇恩猶念勤式燕徧恒秩柔遠
及斯人茲邦實大藩伐鼓軍樂陳是時冬服
成戎士氣益振虎竹謬朝寄英賢降上賓旋

章蘇州集一
十一
罄周旋禮愧無海陸珍庭中丸劍闌堂上歌
吹新光景不知晚觥酌豈言頻單醪昔所感
大釀况同忻顧謂軍中士仰荅何由申

司空主簿琴席

煙華方散薄蕙氣猶含露澹景發清琴幽期
默玄悟留連白雪意斷續迴風度掩抑雖已
終忡忡在幽素

晦日處士叔園林燕集

遽看萸葉盡坐闕芳年賞賴此林下期清風

滌煩想始萌動新煦佳禽發幽響嵐嶺對高
齋春流灌蔬壤樽酒遺形迹道言屢開獎幸
蒙終夕歡聊用稅歸鞅

與韓庫部會王祠曹宅

閑門蔭堤柳秋渠含夕清微風送荷氣坐客
散塵纓守默共無恠抱冲俱寡營良時頗高
會琴醞共開情

贈李儋

絲桐本異質音響合自然吾觀造化意二物

相因緣誤觸龍鳳嘯靜聞寒夜泉心神自安
宅煩慮頓可捐何因知久要絲白漆亦堅

贈盧嵩

百川注東海東海無虛盈泥滓不能濁澄波
非益清恬然自安流日照萬里晴雲物不隱
象三山共分明柰何疾風怒忽若基柱傾海
水雖無心洪濤亦相驚怒號在倏忽誰識變
化情

寄馮著

春雷起萌蟄土壤日已踈胡能遭盛明才俊
伏里閭偃仰遂真性所求唯斗儲披衣出茅
屋盥漱臨清渠吾道亦自適退身保玄虛幸
無職事牽且覽案上書親友各馳騫誰當訪
弊廬思君在何夕明月照廣除

將往江淮寄李十九儋

燕燕東向來文鵠亦西飛如何不相見羽翼
有高卑徘徊到河洛華屋未及窺秋風飄我
行遠與淮海期回首隔煙霧遙遙兩相思陽

春自當返短翮欲追隨

寄盧庾

悠悠遠離別分此歡會難如何兩相近反使
心不安亂髮思一櫛垢衣思一浣豈如望友
生對酒起長歎時節異京洛孟冬天未寒廣
陵多車馬日夕自遊盤獨我何耿耿非君誰
為歡

發廣陵留上家兄兼寄上長沙

將違安可懷宿戀復一方家貧無舊業薄宦

各飄颺執板身有屬淹時心恐惶拜言不得
留聲結淚滿裳漾漾動行舫亭亭遠相望離
晨苦須臾獨往道路長蕭條風雨過得此海
氣涼感秋意已違况自結中腸推道固當遣
及情豈所忘何時共還歸舉翼鳴春陽

初發揚子寄元校書

悽悽去親愛泛泛入煙霧歸棹洛陽人殘鐘
廣陵樹今朝此為別何處還相遇世事波上
舟公洄安得住

淮上即事寄廣陵親故

前舟已渺渺欲度誰相待秋山起暮鍾楚雨
連滄海風波離思滿宿昔容鬢改獨鳥下東
南廣陵何處在

經少林精舍寄都邑親友

息駕依松嶺高閣一攀緣前瞻路已窮既詣
喜更延出巘聽萬籟入林濯幽泉鳴鍾生道
心暮磬空雲煙獨往雖暫適多累終見牽方
思結茅地歸息期暮年

城中卧疾知閻薛二子屢從邑令飲
因以贈之

車馬日蕭蕭胡不枉我廬方來從令飲卧病
獨何如秋風起漢皋開戶望平蕪即此稀音
素馬知中密踈渴者不思火寒者不求水人
生羈寓時去就當如此猶希心異跡眷眷存
終始

聽嘉陵江水聲寄深上人

鑿崖泄奔湍稱古神禹跡夜喧山門店獨宿

不安席水性自云靜石中本無聲如何兩相
激雷轉空山驚貽之道門舊了此物我情

高陵書情寄三原盧少府

直方難爲進守此微賤班開卷不及顧沉埋
案牘間兵凶久相踐徭賦豈得閒促戚下可
哀寬政身致患日夕思自退出門望故山君
心儻如此攜手相與還

同長源歸南徐寄子西子烈有道

東洛何蕭條相思邈遐路策駕復誰遊入門

無與晤還因送歸客達此緘中素屢睽心所
歡豈得顏如故所歡不可睽嚴霜晨淒淒如
彼萬里行孤妾守空閨臨觴一長歎素欲何
時諧

韋蘇州集卷第一

韋蘇州集卷第二

五言古詩

同德精舍養疾寄河南兵曹東廳掾
逍遙東城隅雙樹寒葱蒨廣庭流華月高閣
凝餘霰杜門非養素抱疾阻良讌孰謂無他
人思君歲云變官曹亮先忝陳躅慙俊彥豈
知晨與夜相代不相見緘書問所如酬藻當
芬絢

同德寺雨後寄元侍御李博士

川上風雨來須臾滿城闕岌嶷青蓮界蕭條
孤興發前山遽已淨陰靄夜來歇喬木生夏
涼流雲吐華月嚴城自有限一水非難越相
望曙河遠高齋坐超忽

使雲陽寄府曹

夙駕祗府命冒炎不遑息百里次雲陽閭閻
問漂溺上天屢憊氣胡不均寸澤仰瞻喬樹
顛見此洪流跡良苗免湮沒蔓草生宿昔頽
墉滿故墟返喜將安宅周旋涉塗潦側峭緣

溝脉仁賢憂斯民賤子甘所役公堂衆君子
言笑思與覲

過扶風精舍舊居簡朝宗巨川兄弟
佛刹出高樹晨光問井中年深念陳跡迨此
獨忡忡零落逢故老寂寥悲草虫舊宇多改
構幽篁延本叢栖止事如昨芳時去已空佳
人亦攜手再徃今不同新文聊感舊想子意
無窮

贈馮著

契闊仕兩京念子亦飄蓬方來屬追往十載
事不同歲晏乃云至微褐還未充慘悽遊子
情風雪自關東華觴發懽顏嘉藻播清風始
此盈抱恨曠然一夕中善蘊豈輕售懷才希
國工誰當念素士零落歲華空

對雨寄韓庫部協

颯至池館涼霽然和曉霧蕭條集新荷氤氳
散高樹閑居興方淡默想心已屢暫出仍濕
衣况君東城住

寄子西

夏景已難度懷賢思方續喬樹落踈陰微風
散煩燠傷離枉芳札忻遂見心曲藍上舍已
成田家雨新足託鄰素多欲殘秩猶見束日
夕上高齋但望東原綠

對雪贈徐秀才

靡靡寒欲收靄靄陰還結晨起望南端千林
散春雪妍光屬瑤階亂緒陵新節無為掩扉
卧獨守表生轍

西郊遊宴寄贈邑僚李巽

升陽暖春物置酒臨芳席高宴闕英僚衆賓
寡歡懌是時尚多壘板築興頽壁羈旅念越
疆領徒方祗役如何嘉會日當子憂勤夕西
郊鬱已茂春嵐重如積何當返徂雨雜英紛
可惜

休沐東還胄貴里示端

宦遊三十載田野久已踈休沐遂茲日一來
還故墟山明宿雨霽風暖百卉舒泓泓野泉

潔熠熠林光初竹木稍摧翳園場亦荒蕪俯
驚鬢已衰周覽昔所娛存沒惻私懷遷變傷
里閭欲言少留心中復畏簡書世道良自退
榮名亦空虛與子終攜手歲晏當來居

朝請後還邑寄諸友生

宰邑分甸服夙駕朝上京是時當暮春休沐
集友生抗志青雲表俱踐高世名尊酒且懽
樂文翰亦縱橫良遊昔所希累讌夜復明晨
露含瑤琴夕風殞素英一旦遵歸路伏軾出

京城誰言再念別忽若千里行閑閤寡誼訟
端居結幽情況茲晝方永展轉何由平

澧上西齋寄諸友

絕岸臨西野曠然塵事遙清川下邈迤茅棟
上岩堯翫月愛佳夕望山屬清朝俯砌視歸
翼開衿納遠颺等陶辭小秩効朱方負樵閒
遊忽無累心跡隨景超明世重才彥雨露降
丹霄群公正雲集獨予欣寂寥

獨遊西齋寄崔主簿

同心忽已別昨事方成昔幽逕還獨尋綠苔
見行跡秋齋正蕭散煙水易昏夕憂來結幾
重非君不可釋

秋集罷還途中作謹獻壽春公黎公

束帶自衡門奉命宰王畿君侯枉高鑒舉善
掩瑕疵斯民本已安工拙兩無施何以酬明
德歲晏不磷緇時節乃來集欣懷方載馳平
明大府開一得拜光輝温如春風至肅若嚴
霜威群屬所載瞻而忘倦與飢公堂燕華筵

禮罷復言辭將從平門道憇車澧水湄山川
降嘉歲草木蒙潤滋孰云還本邑懷戀獨遲
遲

閒居贈友

補吏多下遷罷歸聊自度園廬旣蕪沒煙景
空澹泊閑居養痾瘵守素甘葵藿顏鬢日衰
耗冠帶亦寥落青苔已生路綠筠始分籜夕
氣下遙陰微風動踈薄草玄良見誚杜門無
請託非君好事者誰來顧寂寞

四禪精舍登覽悲舊寄朝宗巨川兄
弟

蕭散人事憂迢遶古原行春風日已暄百草
亦復生躋閣謁金像攀雲造禪扃新景林際
曙雜花川上明徂歲方緬邈陳事尚縱橫温
泉有佳氣馳道指京城携手思故日山河留
恨情存者邈難見去者已冥冥臨風一長慟
誰畏行路驚

善福閣對雨寄李儋幼遐

飛閣凌大虛晨躋鬱崢嶸驚飈觸懸檻白雲
冒層薨大陰布其地密雨垂八紘仰觀固不
測俯視但冥冥感此窮秋氣沉鬱命友生及
時策高步羈旅遊帝京聖朝無隱才品物俱
昭形國士秉繩墨何以表堅貞寸心東北馳
思與一會并我車夙已駕將逐晨風征郊塗
住成淹默默阻中情

寺居獨夜寄崔主簿

幽人寂不寐木葉紛紛落寒雨暗深更流螢

度高閣坐使青燈曉還傷夏衣薄寧知歲方
晏離居更蕭索

九日澧上作寄崔主簿倬二李端繫

淒淒感時節望望臨澧渙翠嶺明華秋高天
澄遙滓川寒流愈迅霜交物初委林葉索已
空晨禽迎飈起時菊乃盈泛濁醪自為美良
遊雖可娛殷念在之子人生不自省營欲無
終已孰能同一酌陶然冥斯理

西郊養疾聞暢校書有新什見贈又

韋蘇州集
卷二
侍不至先寄此詩

養病愜清夏，郊園敷卉木。窓夕含澗涼，雨餘愛筠綠。披懷始高詠，對琴轉幽獨。仰子遊群英，吐詞如蘭馥。還聞枉嘉藻，佇望延昏旭。唯見草青青，閉門澧水曲。

澧上寄幼遐

寂寞到城闕，惆悵返柴荆。端居無所爲，念子遠徂征。夏晝人已息，我懷獨未寧。忽從東齋起，兀兀尋澗行。晉罍叢榛密，披翫孤花明。曠

然西南望，一極山水情。周覽同遊處，逾恨阻音形。壯圖非旦夕，君子勤令名。勿復久留燕，蹉跎在北京。

善福精舍示諸生

湛湛嘉樹陰，清露夜景沉。悄然群物寂，高閣似陰岑。方以玄默處，豈爲名跡侵。法妙不知歸，獨此抱冲襟。齋舍無餘物，陶器與單衾。諸生時列坐，共愛風滿林。

晚出澧上贈崔都水

華蓋九集二
臨流一舒嘯望山意轉延隔林分落景餘霞
明遠川首起趣東作已看耘夏田一從民里
居歲月再徂遷昧質得全性世名良自牽行
欣攜手歸聊復飲酒眠

開元觀懷舊寄李二韓二裴四兼呈
崔郎中嚴家令

宿昔清都燕分散各西東車馬行跡在霜雪
竹林空方軫故物念誰復一尊同聊披道書
暇還此聽松風

春日郊居寄萬年吉少府中孚三原
少府偉夏侯校書審

谷鳥時一轉田園春雨餘光風動林早高窓
照日初獨飲澗中水吟詠老氏書城闕應多
事誰憶此閒居

還闕首途寄精舍親友

休沐日云滿冲然將罷觀嚴車候門側晨起
正朝冠山澤含餘雨川澗注驚湍攬轡遵東
路回首一長嘆居人已不見高閣在林端

秋夜南宮寄澧上弟及諸生

暝色起煙閣沉抱積離憂况茲風雨夜蕭條
梧葉秋空宇感涼至頽顏驚歲周日夕遊闕
下山水憶同遊

塗中書情寄澧上兩弟因送二甥

華簪豈足戀幽林徒自違遙知別後意寂寞
掩郊扉回首昆池上更羨爾同歸

寄柳州韓司戶郎中

達識與昧機智殊跡同靜於焉得携手屢賞

清夜景蕭灑陪高詠從容羨華省一逐風波
遷南登桂陽嶺舊里門空掩歡遊事皆屏悵
望城闕遙幽居時序永春風吹百卉和煦變
問井獨悶終日眠篇書不復省唯當望雨露
霑子荒遐境

寄令狐侍郎

三山有瓊樹霜雪色逾新始自風塵交中結
綢繆姻西掖方掌誥南宮復司春夕燕華池
月朝奉玉階塵衆寶歸和氏吹噓多俊人群

公共然諾聲問邁時倫孤鴻既高舉燕雀在
荆榛翔集且不同豈不欲殷勤一旦遷南郡
江湖渺無垠寵辱良未定君子豈緇磷寒暑
已推斥別離生苦辛非將會面目書札何由
申

園林晏起寄昭應韓明府盧主簿

田家已耕作井屋起晨煙園林鳴好鳥間居
猶獨眠不覺朝已晏起來望青天四體一舒
散情性亦忻然還復茅簷下對酒思數賢束

帶理官府簡牘盈目前當念中林賞覽物遍
山川上非遇明世庶以道自全

寄大梁諸友

分竹守南譙彌節過梁池雄都衆君子出餞
擁河湄燕譎始云洽方舟已解維一爲風水
便但見山川馳昨日次睢陽今夕宿符離雲
樹愴重疊煙波念還期相敦在勤事海內方
勞師

新秋夜寄諸弟

華蘄九集卷之九
十一
兩地俱秋夕相望共星河高梧一葉下空齋
歸思多方用憂人瘼况自抱微疴無將別來
近顏鬢已蹉跎

郊園聞蟬寄諸弟

去歲郊園別聞蟬在蘭省今歲卧南譙蟬鳴
歸路永夕響依山郭餘悲散秋景緘書報此
時此心方耿耿

寄中書劉舍人

雲霄路竟別中年跡暫同比翼趨丹陛連騎

下南宮佳詠邀清月幽賞滯芳藂迨予一出
守與子限西東晨露方蒼蒼離抱更冲冲忽
覩九天詔秉綸歸國工玉座浮香氣秋襟散
涼風應向橫門度環珮杳玲瓏光輝恨未矚
歸思坐難通蒼蒼松桂姿想在掖垣中

郡齋感秋寄諸弟

首夏辭舊國窮秋卧滁城方知昨日别忽覺
徂歲驚高閣收煙霧池水晚澄清戶牖已淒
爽晨夜感深情昔遊郎署間是月天氣晴授

華蘇州集卷二
衣還西郊曉露田中行采菊投酒中昆弟自
同傾簪組聊掛壁焉知有世榮一旦居遠郡
山川間音形大道庶無累及茲念已盈

郡中對雨贈元錫兼簡陽凌

宿雨冒空山空城響秋葉沉沉暮色至淒淒
涼氣入蕭條林表散的礫荷上集夜霧着衣
重新苔侵履濕遇茲端憂日賴與嘉賓接

冬至夜寄京師諸弟兼懷崔都水

理都無異政所憂在素飡徒令去京國羈旅

當歲寒子月生一氣陽景極南端已懷時節
感更抱別離酸私燕席云罷還齋夜方闌邃
幕沉空宇孤燭照牀單應回茲夕念寧忘故
歲歡川塗恍悠邈涕下一闌干

元日寄諸弟兼呈崔都水

一從守茲郡兩鬢生素髮新正加我年故歲
去超忽淮濱異時候了似仲秋月川谷風景
溫城池草木發高齋屬多暇惆悵臨芳物日
月昧還期念君何時歇

寄職方劉郎中

相聞二十載不得展平生一夕南宮遇聊用
寫中情端服光朝次群列慕英聲歸來坐粉
闈揮筆乃縱橫始陪文翰遊歡燕難久并子
因謬忝出君為沉疾嬰別離寒暑過荏苒春
草生故園茲日隔新禽池上鳴郡中永無事
歸思徒自盈

社日寄崔都水及諸弟群屬

山郡多暇日社時放吏歸坐閣獨成悶行塘

閱清輝春風動高柳芳園掩夕扉遙思里中
會心緒悵微微

寒食日寄諸弟

禁火暖佳辰念離獨傷抱見此野田花心思
杜陵道聯騎定何時予今顏已老

三月三日寄諸弟兼懷崔都水

暮節看已謝茲晨愈可惜風澹意傷春池寒
花歛夕對酒始依依懷人還的的誰當曲水
行相思尋舊跡

寄楊協律

吏散門閣掩鳥鳴山郡中遠念長江別俯覺
座隅空舟泊南池雨簾卷北樓風併罷芳樽
燕為愴昨時同

郡齋贈王卿

無術謬稱簡素食空自嗟秋齋雨成滯山藥
寒始華濩落人皆笑幽獨歲逾賒惟君出塵
意賞愛似山家

簡怛璨

室虛多涼氣天高屬秋時空庭夜風雨草木
暎離披簡書日云曠文墨誰復持聊因遇澄
靜一與道人期

寄暢當

寇賊起東山英俊方未閑聞君新應募籍籍
動京關出身文翰場高步不可攀青袍未及
解白羽插腰間昔為瓊樹枝今有風霜顏秋
郊細柳道走馬一夕還丈夫當為國破敵如
摧山何必事州府坐使鬢毛斑

京師叛亂寄諸弟

弱冠遭世難二紀猶未平
羈離官遠郡虎豹滿西京
上懷犬馬戀下有骨肉情
歸去在何時流淚忽霑纓
憂來上北樓左右但軍營
函谷行人絕淮南春草生
烏鳴野田間思憶故園行
何當四海晏甘與齊民耕

贈琮公

山僧一相訪吏案正盈前
出處似殊致喧靜兩皆禪
莫春華池宴清夜高齋眠
世道本無

得寧復有忘筌

寄恒瓌

心絕去來緣跡順人間事
獨尋秋草徑夜宿寒山寺
今日郡齋閑思問楞伽字

簡郡中諸生

守郡卧秋閣四面盡荒山
此時聽夜雨孤燈照窓間
藥園日蕪漫書惟長自閒
唯當上客至談詩一解顏

寄全椒山中道士

今朝郡齋冷忽念山中客澗底束荆薪歸來
煮白石欲持一瓢酒遠慰風雨夕落葉滿空
山何處尋行跡

韋蘇州集卷第二

